

TE NENEURAA API

I neia i te piha neneiraa no te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa. Te hoo e piti farani i te matahiti hoê.

Nu. 5.

Me, 1920

Mat. 14.

"Mai te reira atoa to Iehova faaitoito ia Ziona; e te mau vahi ano i o'na ra, na'na ia e haamahanahana: e na'na e faariro i to'na vahi pâpâmarô ra mai te ô a Iehova; e itea te oaoa e te popou i roto ia'na; te haumaitai, e te reo himene ra."

Isaia 51:3.

"E parahi hoi to'u ra mau taata i roto i te fare mau e te peapea ore' e tia i roto i te parahiraa ora, e te vahi hauti-orehia mai. E mairi mai hoi te âa-paari i nia i te ururaa, e faaitokia ia hoi te oire i te vahi papu."

Isaia 32:18-19.

I ori noa ratou na te medebara na te fenua ano; aore i itea e ratou te oire ei parahiraa ra. Ma te poia e te poiha, roohia ihora ratou i te matapouri; ua tiaoro râ ratou ia Iehova i to ratou atiraa ra, e ua faaora ihora oia ia ratou i to ratou ati.

Salamo 107:4-7.

NA ORA E MAHA.

E maha huru ora e vai nei, oia hoi,-

1. Te ora i te hara tumu o to tatou na metua matamehai.
2. Te ora i te mau hara e ravehia e te taata iho.
3. Te ora i te mau ati o te tino nei.
4. Te ora mure ore.

Ia papu ia tatou te huru mau no taua na ora e maha i paraubia i nia nei e tia'i.

O te hara tumu ra, o te hara ia i ravehia e to tatou na metua matamehai ra, o Adamu, raua Eva, a parahi ai raua i roto i te ô i Edene.

“E i teie nei, no te taata hoê ra i ô mai ai te ino i te ao nei, e no te ino hoi te pohe.” Roma 5: 12.

E piti faahuru-e-raa tei tae i nia iho i te taata no taua hara tumu ra; oia hoi, i faataahia te taata i te aro o te Atua, e ua riro to'na ra tino hanahana tahuti ore, e mea pohe e te tahuti noa. E mai te mea e, aita te taraehara o te Mesia i haapaohia e to tatou Metua here i te ao ra, aita roa to tatou e tiafaahouraa, e ua vai taa-ê-noa, to tatou nei mau tino e to tatou mau varua, e a muri noa'tu.

E mai te mea hoi, aita taua taraehara a te Mesia ra, e ore roa ia e tia ia tatou ia farerei faahou, e ia parahi i pihai-iho, i to tatou Metua i te ra'i ra.

Area râ te na ô maira te Aposetolo e, “Mai te taata i hope i te pohe ia Adamu, e hope atoa i te faaorahia i te Mesia.” 1 Korinetia 15: 22.

E no reira, ua aufau to tatou Faaora, o Iesu, i te tarahu e taima no taua hara ra, e ua hoo oia i te ora na tatou, na roto i te haamaniiraahia to'na iho toto. I te poheraa e te tiafaahouraa o te Mesia, i tiamâ roa'i te taata e hope roa'e i taua hara tumu ra.

“E i teie nei, mai te taata atoa i taea i te utua faahapa i te hara a te taata hoê ra, ua taea-atoa-hia te taata atoa i te tia ia ora, i te parautia a te taata hoê ra.” Roma 5:18.

I te aroha noa, i ora'i tatou i taua hara tumu ra. E rave noa'tu te taata i te mau ohipa hape e te hara rahi, ua ora ratou, e ua tiamâ roa hoi i te hara a Adamu. E ia tae te taata i mua i te haavaraa e ore roa oia e haavahia e faautuahia no te hara i ravehia e to tatou na metua matamua.

No reira Iesu i na ô ai e, “A tuu mai i te tamarii rii ia haere noa mai ia'u nei, e eiaha e tapeahia'tu; mai ia ratou hoi to te basileia o te Atua ra.” Mareko 10:14.

Ia Iesu, te mau tamarii rii i ora'i i te hara tumu ra, e no te mea, aita te tamarii rii i ite i te ture aita atoa hoi e nehenehe ia'na, ia faahapa'tu. O te faahaparaa i te ture, o te

hara ia. E no reira ua faatiamâ-roa-hia te mau tamarîi rii i te hara. E ora noa ratou, bapetito-ore-hia noa'tu. E no reira, te haapiiraa te na ô mai e, "E hara to te tamarîi rii e ia ore te tamarîi ia bapetitohio e pohe mure ore tei noaa ia'na," o te haapiiraa ia o te Diabolo, e to'na ra mau pîpî, e te taata feruri ru noa.

Te piti o te ora i haapii-hia nei o te ora ia, o te taata i ta'na iho mau hara i rave. E taua ravea ora ra, o te Evanelia a Iesu Mesia ia te a'ohia i te mau taata hara. "E ere to te feia ora te tahu'a, no te feia ma'i ra: aore au i haere mai i te feia parautia, i te feia hara râ, ia tatarahapa,." Mareko 2:17.

E noaa taua ora, i te taata ra, mai te mea e, e haapao oia i te mau ture e te mau oroa mo'a no te Evanelia.

"O tei faaroo e ua bapetitohia, e ora ia". Mareko 16:16.

"E tatarahapa, e ia bapetitohia outou atoa i roto i te i'oa o Iesu Mesia ia matara te hara, e horoahia mai ia te Varua Maitai ia outou." Ohipa 2:38.

"Ia ora outou i teie nei ui mârô." Ohipa 5:40. "A tia ia bapetitohia oe, e horoi ê atu i ta oe mau hara i te tauraa'tu i te i'oa o te Fatu." Ohipa 22:16. "E o tei au i te reira, o te bapetito ia, e ora'i tatou atoa i teie nei." I Petero 3:21

"E ua faaroo ma te aau atoa i te hoho'a parau i tuuhia atu ia outou na. E ua faatiamâhia outou i te ino, ua riro iho nei ra outou ei tavini no te parau-tia." Roma 6:17,18.

Na teie mau irava i nia nei, e hapîi mai ia tatou e, e ora te taata hara atoa o te hâapao i te evanelia a Iesu Mesia. E ora mau ratou i te taime e faarue ai ratou i ta ratou mau hara a faaroo e a haapao atu ai i te mau ture a te evanelia. E faatiamâhia te taata i te ino, e e riro ia oia ei tavini no te parautia. E mai te mea e, ua faatiamâhia te hoê taata i te mau ino, ua ora ia oia i reira.

E taua ora i haapiihia i nia nei ra, no te mau taata hara ana'e ia. Aita roa e tia i te mau tamarîi rii ia faaroo e ia ta-

arahapa e ia faarue i te mau ino, no te mea e, aita a ratou hara.

Te toru o te mau huru ora, o te ora ia i te mau ati huru rau, no te oraraa tahuti nei. Ua ora Noa ma i te diluvi. O te pahi te ravea i ora'i. Ua ora Lota i te pohe i roto i te oire o Sodoma. O te hororaa te ravea i ora'i. I te mau mahana no Iakobo, ua tupu te hoê 'o'e sitona. Ua ora Iakobo ma i taua ati ra, na roto i to ratou ra haapaoraa i te parau a te Fatu tei heheuhia ia Iosepha ra. O te ravea ia i ora'i ratou i taua ati ra. Ua ora Mose e te mau tamarii no Iseraela i te tîtiraa i Aiphiiti. Ua ora Paulo i te pohe i roto i te miti.

E i teie mau mahana hopea nei e ora hoi te taata i taua huru ati ra, mai te mea e, e haapao ratou i te parau no nia mai. Te pohe noa nei te taata i te 'o'e, te aueueraa fenua, te ma'i e te tama'i. "Ei te mou'a ra hoi ei Ziona e ei Ierusalema te ora, ta Iehova i parau maira; i roto hoi i te toea taata ta Iehova e parau ra." Ioela 2:32. E no reira, ua faataa te Fatu i taua na vahi e piti ra, oia hoi, Ierusalema e Ziona, ei haapûraa no to'na ra mau taata. Ei taua na vahi e piti hoi e ite ai te feia mo'a i te ora.

E e haaputuputu oia i ta'na ra mau mamoe, mai na otia te maha o te ao nei; mai te vahi mai i pau ai ratou i te mau tiahi haavare; "E parahi noa hoi ratou ma te ora i te medebara; e taoto hoi i roto i te ururaa." Ezekiel 34:25.

Na roto i te beheuraa ana'e e faaitchia'i i te taata te ravea e ora'i ratou i taua mau ati ra no te tino. E no reira, o te feia mo'a ana'e ia te faaorahia i taua mau ati no te mau mahana hopea, no te mea e, o ratou ana'e ia o te tia ia farii i te mau beheuraa.

Ua haapii iho nei tatou i te huru o na ora e toru, e teie tei toe ia tatou i teie nei, oia noi, te feruriraa ia i te huru no te ora mure ore. E noaa teie ora i te taata tino tahuti-ore ana'e, oia hoi tei tiafaahou mai te pohe mai ra.

Te taata paatoa o te pohe hou a'e i taeahia'i te vau o to ratou matahiti, aore râ, te matahiti e ite ai ratou i te maitai e te ino, e noaa ia ia ratou, te ora mure ore.

E noaa hoi te ora mure ore, i te taata hara atoa o te faa-rue i te ino e o te haapao tamau i te mau ture e te mau faa-ueraa e te mau oroa hoi o te Evanelia a Iesu Mesia.

E no reira, e au mau here e, i te aroha noa o Iesu i o-ra'i tatou i te pohe i faataehia mai e to tatou na metua matamehai, i nia iho ia tatou. E ora hoi tatou i to tatou iho mau hara na roto i te haapao-tamau-raa i te evanelia a Iesu Mesia. E ora tatou i te mau ati o te tino nei, na roto i te haapaoraa i te mau faaaraararaa e tae mai ia tatou no ô mai i te Atua. E mai te mea e tamau maite tatou i te e'a afaro e tae noa'tu i te hopea ra, e noaa ia ia tatou te tiafaahouraa matamua e te ora mure ore.

"E tena na, e au mau here e, aita a'e nei outou i faaea i te haapao * * *, e rave faaoti hua i to outou ora ma te mata'u e te rurutaina."

Faaauhia ei reo Tahiti e,
Anederea Sedamana.

ZIONA I NIA I TE MOUA.

Te na ô maira Isaia e, "Mai te reira atoa to Iehova faa-itoito ia Ziona; e te mau vahi ano i o'na ra, na'na ia e haamahanahana: e na'na e faariro i to'na vahi pâpâmârô ra mai te ô a Iehova; e itea te oaoa e te popou i roto ia'na; te haamaitai, e te reo himene ra." Isaia 51: 3.

Te imi na te hoê taata i taua fenua Ziona ra, eiaha oia ia haere na te mau vahi taatahia e te ruperupe no te ao nei, e imi râ oia i te hoê vahi (*ano*), e vahi (*medebara*). Te na ô maira hoi te peropheta Isaia e, "E rearea te medebara e te vahi pâpâmârô ra no ratou; e oaoa hoi te fenua aihere e e ruperupe hoi mai te tiare ra; e ruperupe rahi ia, e ou'au'a noa ma te oaoa e te himene," Isaia 35: 1, 2. Aita te mau tamarii no Ziona e haaputuputuhia i te vahi taatahia, i te

medebara râ, e i te vahi taata-ore-hia. Te haamaramarama atoa mai ra o Davida i te huru no Ziona no te mau mahana hopea nei. Te na ô maira te Salamo o Davida e, "E ua haaputu mai ia ratou mai te mau fenua roa mai; mai te hitia o te râ; e mai te tooa o te râ, mai Apatoerau mai, e mai Apatoa. I ori noa na ratou na te medebara na te fenua ano, aore i itea e ratou te oire ei parahiraa ra." Salamo 107: 3, 4.

Ua ori mau te mau tamarii no Iseraela na te medebara, i te mau mahana no Mose. Ua itea râ ia ratou te hoê oire parahiraa; eiaha te fenua ano e te medebara, mai tei paranhia e Davida, te hoê fenua rupêrupe e te nehenehe râ. O Kanaana taua fenua ra. No reira ua papu roa ia tatou e, e ere ia i te mau tamarii no Iseraela i te tau no te Exodo, tei parauhia nei e Davida.

Te na ô maira Davida e, "Te faariro nei oia i te medebara ei pape hopuna; e te vahi repo mārô ra ei pape pihaa; e ua haaparahi oia i tei pohe i te poia ra i reira, ia faanahonaho ratou i te tahi oire parahiraa." Salamo 107: 35, 36.

Te haapii mai nei taua irava ra e, e repo mārô tei taua vahi ano ra, e no reira ua papu ia tatou e, o te hoê fenua ia tei ore i faararirari-pinepine-hia e te mau ûa haumaruru no te ra'i mai.

O Daniela te tahi tei ite orama i taua mau mea ra, te na ô maira oia e, "Mai ta oe hoi i ite ra e ooti-noa-hia taua ofai ra, no roto i te mou'a aore e rima," Daniela 2:45. E taua ofai ra, no roto mai ia i te mou'a, eiaha te hoê vahi papu, te vahi mou'a râ. E no reira e papu ia ia tatou e, eiaha i te mou'a e itea'i taua "basileia o te ore roa ia e mou, e ore hoi e riro ia vetahi ê; e hope roa hoi taua mau basileia i te parari e te pau, e vai tera e a muri noa'tu." Daniela 2: 44. E no te mea e, ua ite atoa o Isaia e, ei te vahi teitei e, faatiahia'i te fare o Iehova, i na ô mai ai oia e, "A paiuma i nia i te mou'a teitei, e tei hopoi mai i te parau maitai i Zi-

ona nei." Isaia 40: 9. "E parauhia hoi ratou, O te feia mo'a ra, tei faaorahia e Iehova ra; e parauhia hoi oe, O te here-roa-hia ra, te oire eita e faaruehia ra." Isaia 62: 12. Ei roto i te peho o te mau mou'a teitei e vai ai taua oire ra.

"E parahi hoi to'u ra mau taata i roto i te fare mau e te peapea ore, e tia i roto i te parahiraa ora, e te vahi hauti-ore-hia mai. E mairi mai hoi te ûa-paari i nia i te ururaa, e faafaitohia hoi te oire i te vahi papu." Isaia 32: 18-19. Na teie nei irava i haapii papu mai ia tatou e, e vahi teitei e te toetoe te vahi e parahihia e te feia mo'a no te mau mahana hopea nei. I te tau toetoe e mairi mai te ûa-paari e i te tau mahanahana e tahe mai te pape paari e te hiona ia faararirari i te repo mârô e te mau raau ra. "E ia minihia mai te varua no nia mai ia tatou nei, e ia riro te medebara ei aua hotu maitai, e ia manaohia te aua hotu maitai ra ei ururaa. E parahi hoi te parau au i te medebara; e te parau-tia ra, e parahi ia i roto i te aua hotu maitai ra." Isaia 32: 15-16.

I mua'tu i te matahiti 1830, ua vai faatia-ore-hia taua mau parau tohu ra. I muri mai râ i te matahiti 1830, ua tuu mau tei tohu-ê hia na e te mau peropheta ra no taua (*oi-parahiraa*), e no te haaputuraa i te feia mo'a mai na otia maha o te ao nei i te vahi medebara e te ano ra. I te matahiti 1846 e i te matahiti 1847 ua ori te feia mo'a na te medebara, mai te poia e te poiha, e aita e oire parahiraa to rau i reira. Ua tiavaruhia ratou i rapae i to ratou oire nehehe i Navu i Ilinoi. Ua aratai râ te Fatu ia ratou i te hoê vahi ano, te hoê vahi medebara, i nia i te mau mou'a teitei Utaha.

Ua faatia te peropheta a te Fatu, o Birikamu Youne e te feia mo'a hoi no Tei Teitei, i te hoê oire parahiraa i nia i taua mau mou'a teitei ra i parauhia e Isaia. Te tairuru nei te mau e i reira. Te reva'tu nei te mau ture, mai Ziona'tu i te mau taata o te ao nei.

Ua ruperupe anei taua vahi medebara ra, e ua riro anei ia ei aua hotu? Na te mau faehau tamarii Tahiti e haamaramama mai ia tatou i taua vahi ra. Ua tae atu ratou i reira. A ui ia ratou, ua ruperupe anei te peho iti i parauhia Utaha?

E vahi hauti-ore-hia mai anei taua vahi mou'a ra? Te parahi nei anei te mau taata a te Atua i roto i te fare mau e te peapea ore, i reira? Oia mau ia. Aita te mau ati mata'i, te mau ati miti, te mau pape pue, te mou'a auahi e te aueneraa fenua e te tamai i itea i reira.

Te na ô maira Isaia e, "E parauhia hoi ratou, O te feia mo'a ra, tei faaorahia e Iehova ra." Ua parauhia anei ratou, "Te feia mo'a ra?" Oia mau ia, Te Etaretia a Iesu Mesia i (te *Feia Mo'a*) i te Mau Mahana Hopea Nei. Ua faaorahia anei ratou e Iehova ra? Oi pohe roa te feia mo'a i te poia e te poiha e te mau ati, a tere ai ratou na te medebara, area râ, ua tiaoro ratou ia Iehova e ua faaora oia ia ratou i to ratou mau ati.

E iteahia anei te "oaoa e te popou i roto ia'na, e te haamaitai, e te reo himene ra?" Te oaoa nei te feia mo'a o tei parahi i Ziona, no te mea e, te ite nei ratou e, e feia here-rahia ratou, e e ore roa ratou e faaruehia e to ratou ra Atua. Te faaroohia nei te haamaitai e te reo himene no te hoê pupu himene faito-ore-hia, i roto i taua mou'a ra. E pae hanere pîpî i roto i taua pupu himene no te Fare Menemene, e ua parare to ratou roo maitai na te mau fenua o te ao nei.

E te mau tamarii no Iseraela e, te Feia Mo'a no te mau mahana hopea nei e, a pii ma te oaoa rahi, "Aue te nehenehe o te avae o te vea i nia i te mou'a, o tei hopoi mai i te parau maitai ra, o tei faaite hua mai i te parau hau ra! o tei hopoi mai i te parau oaoa e te maitai ra! o tei faaite hua mai i te ora ra! o tei parau mai ia Ziona, Tei to Atua ra te hau! E faateitei to mau faehau i to ratou reo; e umere patao to ratou reo; e hio hoi ratou, te mata e te mata, i to Iehova faaho'iraa mai ia Ziona." Isaia 52:7,8.

Faaauhia ei reo Tahiti e, Anederea Sedamana.



MAI TE AHA TE HURU O TA TATOU FAAHURU-E-RAA-HIA?

Te na ô maira te Fatu, O Iesu e, "Oia mau ta'u e parau atu ia outou nei, Ia ore outou ia faahuru-ê-hia e ia riro mai te tamarîi ra e ore roa outou e ô i te basileia ra o te ao ra."

Te tamarîi maitai, e mea au maitai ia'na te haapiiraa a to'na metua: e e faaite oia i te reira na roto i ta'na haapao-maitai-raa i te mau parau e te mau faaueraa a to'na ra metua. E maitai a'e ia'na te pohe i te haamauiuiraa'tu i to'na metua na roto i ta'na haapao-ore-raa i to'na ra mau a'oraa.

E mau tamarîi ana'e tatou no te Fatu; e te Evanelia ra, o ta'na ia haapiiraa ia tatou nei. E faahuru-ê-hia tatou mai te au i ta tatou faaroora e ta tatou haapao-tamau-raa i te reira.

Ua oti ia tatou te fariiraa i te Evanelia, teie râ tei toe ia tatou nei, te haapao-tamau-raa i taua mau ture ra mai te tamarîi maitai e haapao i te parau a to'na ra metua.

E hiopoa tatou ia tatou iho penea'e o te itea ia tatou te hoê mau patoiraa i te mau haapiiraa parau mau a te Fatu.

Papaihia e, Anedera Sedamana.

E TUPU MAI TE PARAU MAU NO ROTO I TE FENUA.

Te tia ra vau i pihaiiho i te hoê papepihaa o te tahe noa to'na pape na te hoê faa. I na pae e piti o taua pape rii ra, e mea ano e te pāpāmārô te repo; area râ i te vahi mau i tahe ai te pape, e mea heeuri e te araaraa te fenua. Te tupu noa ra te mau raau rii e te mau huru tiare i taua vahi ra. O reira te mau manu o te himene noa i te mau himene faaoaoa, e te mau debure hoi o te maimi i te mau tiare noanoa e noa'a'i te meli ia ratou.

Hio a'era vau i raro rii a'e i taua vahi ra, ite ihora vau i te amaaraa o taua pape ra; e inaha i te mau vahi atoa i taeha e te pape o teie mau amaa, i faarirohia te fenua ano ei paradaiso.

Feruriruri ihora vau e i teie mau mea; tupu ihora te mare rahi i roto ia'u no te mana rahi o taua pape rii nainai ra. I tiarehia te medebara ia'na.

I te matahiti 1827 i muri mai i te fanauraa o te Mesia, e vahi ano e te poiri teie nei ao. "E ati hoi te fenua i te poiri e te mau nunaa i te poiri taotao." Isaia 60:2. E 'o'e to nia i te fenua nei i taua matahiti ra. "E ere râ i te 'o'e maa ore, e te hiaai i te pape, i te faaroo râ i te parau a Iehova * *." Na roto râ i te here rahi o te Fatu, i faatupu ai oia i te hoê pape piha haumaru. No roto mai teie pape i te fenua. E taua pape ra o te parau mau ia, oia hoi te Buka a Moromona. "E tupu mai te parau mau no roto i te fenua * *." Salamo 85:11.

Tupu a'era te ite e te paari mau o te Fatu i roto i te au o te taata nei, no te mea ua puta te paruru o te poiri taotao i te mau hihi o te heheuraa apî, e ua maramarama faahou to te ao.

E mai te fenua pâpămărô ra i hiaai i pape haumaru ra, ua na reira hoi te taata parautia i te hiaai i tana parau mau o te papaihia i roto i te Buka a Moromona ra. E mai teie anapape rii i faaruperupe i te mau vahi ano e te medebara i taeahia e ana ra, ua na reira hoi te evanelia i te faaruperupe e te faaoaoa i te aau o te taata atoa o tei farii i te reira.

E pape pihaa rahi e te puai te evanelia a Iesu Mesia; e na roto i te itoitoe o te mau orometua e te mana hoi o te Fatu te afaihia nei ia evanelia i te mau taata atoa o te ao nei. Te faarirohia nei te ao nei ei paradaiso. "E tau noa mai te mau manu o te reva i roto i te mau amaa" o te raau sinapi o te faararirarihia e te pape haumaru o te evanelia. E meli hoi to reira no te mau debure ra.

E au mau here e, ia afaihia'tu teie pape ia outou ra eiaha outou ia faahoi atu e inu râ e ia i te aau.

Faaauhia ei reo Tahiti e, Aneterea Sedamana.

Mau Parau Apî

Ua tae mai te parau ia tatou e, ua pohe to tatou taeae orometua o Petero Wideso. I te 14 no Mati i pohe ai. E haamana'o te mau taeae paari e te mau tuahine paari i taua orometua ra. Ua tae mai oia i te mau fenua moana nei i te matahiti 1897, e ua rave itoitoe oia i te ohipa i te mau fenua Socaïete e tae noa'tu i to'na ho'iraa i America, i te matahiti 1901.

Ua fanau o Petero i te oire Nomsos, i te tufaa fenua Norue (Norway) i Europa. Ua faafariuhia mai to'na ra na metua i te evanelia tei afaihia'tu i Norue e te mau Vea i Ziona. I muri mai, i te matahiti 1883, ua tere atu to'na ra na metua e to raua mau tamarii i te tufaa fenua Utaha i America. Ua haere Petero i te haapiiraa i te oire Logana i Utaha, e ia oti to'na haapiiraa i taua oire ra, ua haere atu oia i te hoê haapiiraa teitei no te fenua America. O Harvard, te i'oa o taua haapiiraa ra.

I muri mai, i te matahiti 1909, ua maitihia oia ei epititopo no te hoê amaa o te Etaretia i te oire Roto Miti, i Utaha. Ua maitihia i hora oia ei Peresideni no te haapiiraa no te Etaretia i te oire Roto Miti ra.

Ua papai oia i te hoê mau buka o tei haamaramarama i te huru no te mau haapiiraa a te Etaretia a Iesu Mesia i te Feia Mo'a i te Mau Mahana Hopea Nei.

E ohipa rahi e te maitai hoi ta'na i rave i te mau fenua moana nei, e i te fenua popaa hoi.

Ua tavini mau oia i te Fatu e tae noa'tu i te hora i ravehia'i oia e te Atua. Ua haere o Petero na te e'a e haerehia e te taata atoa, area râ ta'na ra mau ohipa maitai i rave, te vai noa ra ia, e no reira, pohe noa'tu oia, e ore roa oia e moe ia tatou nei.

L. H. KENNARD Jr. Imprimeur, Rue Brea et de la
Rue Dumont d'Urville, Orovini, Papeete, Tahiti.
